

ICONO DI CULTURA "MIMI KOCK" TA WORDO DERA AWE



Awe tardi 4 or lo tin entiero di e Icono di Cultura, un di e baluartenan di cultura, un figura clave, admira y respeta di San Nicolas, Sr. Emilio Francisco Kock, mihor conoci como "Mimi".

Mimi a fayece diasabra, locual a trece un tristeza enorme den mundo cultural di nos isla, principalmente den mundo di baile folklórico y baile di cinta. Mimi a fayece, na edad di 92 aña.

Na Aruba e tabata wordo considera e Tata di Baile di Cinta y pa mas di 5 decada

tabata bishita distrito pa distrito di nos isla riba fiestanan nacional cu su grupo di baile di cinta pa deleita su pueblo.

Por a mira e grupo aki no solamente riba terenonan di wega di bala pero tambe den patrio di clubnan social, centronan di barío di nos isla, manifestacionnan cultural, hotelnan y semper Mimi controlando cada movecion di su miembronan di grupo, for di comienzo te fin, de vez en cuando bailando ademas.

Pa mas di 20 aña el a dirigi

e grupo di baile Flor di Jazmin despues di a tuma over Flor di Palisia cu tabata grupo di su ruman Marcial.

Cu fayecimento di Marcial, Mimi a drenta mas activo den mundo di baile folklórico cu tanto Flor di Palisia, y cu flor di Jazmin ademas a duna lesnan di baile na mayoria di grupo di nos grandinan y varios grupo di hobennan y di mucha.

Mimi tabata un cara conoci na varios scol di nos isla unda e tabata duna lectura y pa varios instancia y organizacion y bibliotecanan y unda e tabata presenta cu su grupo di baile of su grupo di baile di cinta.

Respet masha grandi Mimi a goza di dje di tur hende cu a conoce y den su gruponan di baile, loke tambe el a hinca seriamente den mente di esnan cu a haya les di dje, tabata disciplina.

Bao di e cara serio cu tabata



wordo mirana actividadnan unda su gruponan ta actua, semper tabata tin e cara di e humorista. Semper e tabata cla pa reparti un chasco y conta un of otro anecdotita.

Cu e cara serio mes, semper e sonrisa tabata tey y bo sa cu e ta den bon humor y

contento.

Durante mas o menos 20 aña Flor di Jazmin a participa den Bon Bini Festival y semper logrando cantidad di aplauso di bishitantenan y na varios ocasion Mimi a goza di aplauso cu bishitantenan

Sigui Lesa Pg. 27



... Continuacion Pagina 26



lantando riba pia pa dune admiracion y respet personal.

Mimi tabata un personahe stima den mundo di baile na Aruba, cosechando respet cerca profesionalnan di baile y instructornan.

Dos di su bailenan cu tabata hopi gusta fuera di e wals, tumba, mazurca of

fox, tabata e Varsoviana cu su grupo so tabata balia y e cancion Tennessee Waltz. Den prome parti di decada 60 Mimi hunto cu Juby Naar y Lang Geerman d.f.m., tabata duna lesnan di Square Dance den Commandeursbaai Club unda Juby Naar tabata dirigi e club juvenil "Centro juvenil Commandeursbaai" cu te

awe e "grandinan awe", pero "e hobennan" di e tempo ey, ta papia di dje cu nostalgia.

Su ruman Marcial tambe tabata un instructor hunto cu nan, intercambiando como instructor pa bailenan tipico e tempo ey.

Un grupo infantil y hubenil cu awe ta un grupo hubenil di baile, ganador di Premio Felipito Tromp, ta Sunrise Dancers bao direccion di Ferdinand Franca.

E grupo aki a lanta y bao di instruccion di Mimi den principio, Ferdinand a logra hiba Sunrise Dancers na e nivel y calidad di grupo hubenil di baile folklorico cu e grupo ta awe y cu varios di e integrantenan hubenil awe pero cu a cuminsa como infantil mas di 10 aña pasa.

Pa hopi aña Mimi tabata activo riba tereno politico y pa decadanan largo a keda como simpatisador di Partido Patriotico Arubano y tabata ademas candidato riba lista pa e partido aki na varios ocasion.

Mimi ta ademas un di e personanan cu a wordo condecora pa La Reina como Ridder in de orde van Oranje - Nassau.



Awe tardi lo por spera un despedida cultural for di momento cu famianan, integrantenan di gruponan di baile etc. sali for di Ad Patres Funeral Home acompaando Mimi pa misa y ta ser spera tambe cu miembronan di gruponan di baile cu a yega di haya les cerca dje, lo presenta den trahe di baile awe tardi, pa duna Mimi e despedida mereci.

su recuerdo lo sigui biba den memoria di cada un cu a conoce.

Sigur ta cu pa hopi aña su nomber lo wordo menciona na momento di acontecimentonan grandi riba nos isla.

Hopi forza ta bay na su yiunan, nietonan y bisanietonan, rumannan y demas famia y cu Mimi sosega eternamente na paz.

Mimi a bay laga nos, pero

Juby Naar.

